



Komunikadu Imprensa **15 Jullu 2020**

JSMP fahe informasaun kona-ba direitu ema ho defisiénsia no asesu bá justisa formál ba membru sira AHDMTL

Iha 10 Jullu 2020, JSMP fahe informasaun kona-ba enkuadramentu legál sira ne'ebé fó protesau ba direitu ema ho defisiénsia sira inklui papél instituisaun judisiáriu sira liga ho prosedimentu kazu sira iha tribunál tantu krime no sivíl. Formasaun ida ne'e fó ba staff no membru Asosiasaun Halibur Defisiénsia Matan Timor-Leste (AHDMTL), iha sira nia edifísiu, Manleuana.

“Formasaun ida ne'e hanesan meiu ida atu partilla informasaun sira liga ho direitu ema ho defisiénsia sira, papél instituisaun judisiáriu no sira nia direitu asesu ba justisa tuir Konstituisaun, lei penál, lei sivíl no instrumentu internasionál sira ne'ebé Timor Leste opta ona,” dehan Ana Paula Marçal, Diretóra Ezekutiva JSMP.

Partisipante sira ne'ebé partisipa iha formasaun loron sorin ne'e mai hosi funcionáriu no membru AHDMTL sira hosi Munisípiu Aileu, Suai, Manufahi, Maliana, Likisá, Vikeke no Baukau. Totál partisipante sira hamutuk 28 kompostu hosi feto 16 no mane 12.

Iha abertura, Sr. Luciano Borges, Jestór Programa AHDMTL haktuir katak formasaun ida-ne'e importante tebes no liuhusi formasaun ne'e bele hasae partisipante sira nia koñesimentu liga direitu ema ho defisiénsia sira asesu bá justisa formál. Tanba ne'e, nia husu ba partisipante sira atu fó atensaun másimu no ativu iha formasaun ne'e.

Entretantu antes taka formasaun, Sr. Luciano Borges, lori AHDMTL nian naran agradese tebes bá ekipa JSMP tanba bele fahe ona informasaun kona-ba asesu ba justisa bá ema ho defisiénsia sira. Nia espera katak liuhusi formasaun loron sorin ne'e partisipante iha ona koñesimentu no bele hatene di'ak liután direitu sira nian nu'udar ema defisiénsia ne'ebé mak hetan protesau tuir lei no hatene ona oinsá lori sira nia kazu bá tribunál bainhira enfrenta kazu ruma.

Durante formasaun ne'e, partisipante sira ativu hodi apresenta kestaun sira liu-liu kona-ba prosesu kazu kleur liga ho ema ho defisiénsia nu'udar vítima. Hatan ba preokupasaun ne'e, JSMP esplika katak iha kazu balun kompleksu tanba ne'e persiza tempu naton atu halo investigasaun. Iha kazu balun parte sira (arguidu, vítima no testemuña sira) la kolabora ho prokuradór ka tribunál no tenke bá buka tuir ema sira ne'e.

Aleinde kestaun sira iha leten, JSMP mós esplika artigu relevente sira iha Kódigu Prosesu Penál, Kódigu Penál, Kódigu Sivíl no Kódigu Prosesu Sivíl ne'ebé fó protesaun espesífiku bá ema ho defisiénsia sira.

Treinamentu hanesan, JSMP halo ona ba membru ema ho defisiénsia hosi organizasaun Ra'es Hadomi Timor Oan (RHOT), ho materia kona-ba kna'ar orgaun soberanu, demokrásia, prosesu halo lei no asesu bá justisa formál. Partisipante sira ne'e rekomenda atu treinamentu hanesan ne'e bele kontinua nafatin iha futuru.

Atu hetan informasaun kompletu, favór kontaktu:

Ana Paula Marçal

Diretora Ezekutivu JSMP

Diresaun e-mail: ana@jsmp.tl

Telefone: 3323883 | 77040735

Website: <https://jsmp.tl/>

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77257466

www.jsmp.tl

luis@jsmp.minihub.org

Facebook: www.facebook.com/timorleste.jsmp

Twitter: @JSMPtl